

四庫全書

史部

欽定四庫全書

皇朝通志卷四十七

禮畧

凶禮

臣等謹按鄭樵通志凶禮門列大喪及山陵制至朋友相為服諸目內如天子弔大臣服天子為大臣及諸親舉哀諸侯及公卿大夫為天子服皇太后長公主及三夫人以下為天子服杖四條皆綜

括於典禮中初不必另述為條目至如挽歌秀孝
為舉將服郡縣吏為守令服師弟子相為服朋友
相為服五條皆因時設義不必垂為定制茲謹畧
諸目惟述

本朝典制之大者載於篇中恭惟我

朝以純孝治天下

列聖

列后大事定行三年之喪一切禮儀斟酌古今慎重賅備

歷稽古昔未有若斯之盡禮盡哀者謹依會典通禮所載序

列聖大喪儀

列后大喪儀而

皇貴妃以下喪儀

皇子以下喪儀以次序列至服制之設通行於天下者誠為盡倫盡制經常不易之恒典謹附著於篇末以昭成法焉

列聖大喪儀

凡

列聖大喪初喪

嗣皇帝就主喪位冠去緯哭踊宮中自

皇后以下咸摘耳環去首飾屆時恭奉

梓宮奉安於

宮中正殿設几筵建丹旒於宮門之左陳法駕鹵簿

於宮門之外至

太和門外

特簡王公大臣恭理喪儀既斂乃奠王公以下民公侯

伯子男以上二品官於

乾清門外三品以下文武有頂帶官於

景運門外

皇后

妃

嬪宮人公主

皇子

皇孫福晉及近支王公福晉夫人於

几筵殿內諸王公福晉夫人郡主縣君以上二品夫人
於丹墀右三品淑人以下於

隆宗門外齊集哭臨皆男摘冠緯女去首飾奠獻時
皆隨行禮舉哀畢各退

皇帝成服截髮辮居倚廬

皇子

皇孫隨成服截髮辮居宮中別室王公百官宗室覺
羅咸成服截髮辮旗員居

闕左門外漢員於各官署

皇后率

妃嬪等成服翦髮

皇子

皇孫福晉隨成服翦髮諸王福晉命婦及內府三旗
官員護軍等妻咸成服翦髮

欽定四庫全書

皇朝通志
卷四十七

皇帝行三年喪禮百日內

上諭用藍筆百日後素服

御門聽政

郊

壇大祀祭服行禮詣

几筵前仍喪服諸

皇子

皇孫及恭理喪儀王公大臣

殯宮守衛執事各官百日除服羣臣二十七日除服咸百日薙髮奏疏文移二十七日内皆用藍印京朝官二十七月不作樂期年不嫁娶在京軍民人等二十七日素服百日不作樂一月不嫁娶頒

遺詔於天下直省官期年不作樂百日不嫁娶不薙髮軍民去冠緯素服二十七日百日不作樂一月不嫁娶成服後朝晡日中三設奠朝夕奠設法駕鹵簿三日後至一月設鑾駕鹵簿每奠王公百官咸齊

集賢明

皇帝出倚廬詣

几筵前東立西嚮舉哀迺啓

宮門恭理喪儀王大臣及執事官率尚茶尚膳舉茶

膳由中門中路進至

几筵前尚茶跪進茶內外齊集衆咸跪

皇帝親舉茶恭奠於茶几行一拜禮衆皆隨行禮尚茶

徹茶衆皆興次尚膳進膳

皇帝親上食畢執事官進奠几於正中

皇帝詣几前跪進爵王大臣跪進爵

皇帝祭酒三爵每祭行一拜禮衆皆隨行禮興迺徹饌
出闔門衆哀止

皇帝還倚廬衆皆退午奠晡奠儀同諏日行殷奠禮王
公百官公主福晉命婦咸齊集所司陳設

皇帝詣

几筵前視饌上食舉哀讀祝官奉祭文至闕外正中北面

跪禮部堂官二人跪展祭文進奠几

皇帝於几前跪衆於齊集處跪哀暫止讀文畢仍復於
紫退衆舉哀迺進爵

皇帝祭酒三爵每祭行一拜禮衆隨行禮舉哀畢徹俎
豆讀祝官奉祭文禮部堂官前引侍臣奉冠服自
殿陞內大臣十人前引恭送燎所

皇帝舉哀隨行詣燎所內大臣侍衛扈從齊集王公百
官咸從

皇帝於燎所祭酒三爵行禮舉哀衆隨舉哀行禮畢
皇帝還倚廬迺焚冠服楮帛衆各退諷日而殯先期以

奉移

梓宮祇告

几筵行啓奠禮禮儀與殷奠同至日奉移

梓宮於

殯宮豫為大昇輦於

景運門外屆時

皇帝詣

几筵舉哀執事官進奠几

皇帝祭酒三爵恭理喪儀王公大臣鑾儀衛工部堂官
率校尉恭進小舉奉

梓宮出登大昇舉禮部尚書祭舉焚楮帛內大臣祭所經
門橋皆三祭酒每祭行一叩禮焚楮帛

皇帝步送王公百官各以次隨行

皇后率

妃嬪等先詣

殯殿後左旁恭俟

靈駕至行奉安禮

皇帝祭酒舉哀衆隨行禮舉哀畢焚楮帛丹旒各退以

側殿為苫次二十七日後

還居倚廬行初祭禮設法駕鹵簿於

殯宮大門外陳設畢

皇帝親詣上食祭酒如前儀翼日繹祭遣官行禮如儀

行大祭禮與初祭儀同翼日繹祭如儀周月讀文
致祭與啓莫同王公九卿及文武官承

旨恭擬

尊謚

廟號進呈

御覽

敕所部製玉

冊寶香

冊寶絹

冊寶誨吉恭行上

尊謚禮前期遣官祇告

天

地

太廟後殿

奉先殿

社稷至日設鹵簿於

殯宮大門外陳設畢

皇帝素服御太和門恭閱

冊寶畢行一跪三拜禮退立東旁大學士詣案前一跪三叩恭奉

冊寶降階陳於各黃亭跪叩如前校尉昇亭御仗黃蓋前導王以下入八分公以上齊集

協和門外

冊寶亭至候過隨行

皇帝還宮易喪服豫詣

殯宮側殿祇俟贊引太常卿二人恭導

皇帝由左門入贊奏就位

皇帝就位立贊跪拜興

皇帝率羣臣行三跪九拜禮興奏跪

皇帝率羣臣跪典儀奏進

冊大學士詣案奉

冊跪獻於左

皇帝受

冊拱舉授禮部堂官跪接興奉安於案三叩退進

寶由右儀亦如之迺宣

冊宣

寶

皇帝率羣臣行三跪九叩禮迺奠帛讀祝三獻爵如儀

禮成恭奉祝帛絹

冊絹

寶送燎所由中道出

皇帝轉立拜位旁西嚮候過復候燎半奏禮成

皇帝還宮衆皆退翼日頒

詔天下百日奠獻儀與初祭同既卜筮吉奉移

山陵前期遣官祇告

天

地

太廟

社稷前奉移一日行祖奠禮儀與啓奠同祭畢焚鑾駕

鹵簿至日執事官陳大昇輦於

殯宮大門外設

冊寶亭於階下

皇帝詣

梓宮前舉哀祭酒三爵衆隨行禮畢

皇帝先至大門東旁立俟奉移

梓宮出跪候過步隨行

梓宮登大昇舉禮部尚書祭舉三祭酒行三叩禮畢焚楮

帛

靈駕發

冊寶亭及騎駕鹵簿咸前列沿途分站豫設

蘆殿繚以黃幔城

皇帝步送至郊

皇太后以下亦先往祇煠王公大臣官員侍衛內監等隨

舉所過門橋遣內大臣祭酒焚楮帛

金定四庫全書
卷四十七
靈駕將至宿次

皇帝率王公百官舉哀跪迎

靈駕安奉於蘆殿迺行晡奠如儀奠畢

皇帝還行宮衆皆退翼日昧爽行朝奠如儀

皇帝跪送啓行步送里外仍先詣宿次如儀

臣等謹按

孝聖憲皇后大喪

皇上恭奉

梓宮至

泰東陵路經

泰陵之東清晨

皇上先展謁

泰陵次詣

泰東陵閱視工程畢豫至

泰陵分路處候

梓宮至暫停

皇上於道旁躬代向

泰陵展叩行禮畢再奉啓行先是會典未有此禮禮臣亦

未經議及

皇上孝思隆篤禮以義起垂為萬世法守因

敕部載入會典通行

至

陵日守

陵貝勒公大臣官員咸於十里外舉哀跪迎

靈駕至

隆恩門外降大昇輦安奉

梓宮於

隆恩殿

皇帝祭酒三爵衆隨行禮舉哀是日遣官祭告各

陵寢並祭

后土

皇陵山神翼日行饗奠禮儀如祖奠

臣等謹按饗奠之禮舊稱遣奠載於會典乾隆四

十二年

皇上恭奉

孝聖憲皇后山陵之禮奉

諭遣字義涉輕忽稱用殊不安於心因

命儒臣稽所自昉大學士等覆奏遣奠之稱禮經並無

明文惟見於孔穎達士喪禮疏唐以後相沿用之

蓋穎達第用儀禮葬日將行苞牲體之車名為遣

車遂取遣字為奠名牽合無當後考儀禮將行之
祭徹巾芑牲鄭康成注云象既饗而歸賓俎也又
禮記雜記云大饗既饗卷三牲之俎歸於賓館所
以為哀也鄭注云既饗歸賓俎言孝子哀親之去
也是將行之祭原用饗禮舊稱遣奠似不若作饗
奠為長既與鄭注相合稱名亦理得心安並請
敕部更正從之謹識於此以著饗奠稱名之所自始焉
大葬前期行遷奠禮儀如饗奠恭理喪儀王大臣

等率夫校進小輦奉移

梓宮於

寶城前蘆殿恭奉

梓宮登龍輜進饌筵

皇帝祭酒三爵衆隨行禮舉哀畢

駕還行宮衆皆退至日

皇帝詣

梓宮前祭酒屆吉時恭移龍輜自隧道入

地宮安奉寶牀設香

冊寶於左右几遂掩閉

元宮

皇帝於方城前舉哀祭酒行禮畢卒哭出至幄次易吉

服王公百官咸采服禮部堂官奏請

皇帝詣

隆恩殿行題

主禮

皇帝入殿左門就拜位立大臣一人啓櫝奉

神主設於題主案大學士二人朝服詣案東行一跪三叩
禮興就位西嚮恭題

神主畢大臣奉

主安於

寶座三叩退迺行虞祭禮

皇帝就拜位王公百官各就拜位上香奠帛讀祝三獻
爵送燎均如儀禮成鑾儀衛堂官率校尉舁黃輿

設階上正中南嚮太常卿跪奏恭請

神位升祔

太廟

皇帝詣

寶座前行一跪三拜禮恭奉

神主奉安黃輿內行一跪三拜禮興內大臣十人大學士

禮部堂官導引啓行

皇帝率王以下各官於大門外跪候過先詣塗次黃幄

祇堊沿途朝夕奠

皇帝親詣上香行三跪九拜禮還京升祔

太廟期年小祥讀文致祭張黃幄於

皇陵方城前陳俎豆列饌筵於祭臺左右

皇帝喪服詣黃幄內奠獻隨往之王公百官咸於

陵寢門外隨行禮舉哀與前祖奠同再期大祥儀與期年

同二十七月行除服禮

皇帝喪服於

皇陵方城前行奠獻禮儀與百日奠獻同祭畢除服三周

行禮儀同再期

列后大喪儀

凡

列后大喪

聖子皇帝主喪儀初喪恭奉

梓宮奉安於

宮中正殿設几筵建丹旒於宮門外之右陳儀駕於

宮門外

皇帝成服截髮辮諸王福晉為子婦者皆成服翦髮

皇太后宮中女侍內監皆成服翦髮截髮辮既斂王以下

及嫔戚於宮門外三品官以下於外門之外福晉

以下及嫔戚婦女於丹墀右三品淑人以下於官

門外齊集舉哀奏疏文移十五日用藍印頒

遺詔於天下內外各官二十七日除服百日不作樂不嫁

娶軍民二十七日不作樂不嫁娶皆百日薙髮朝

晡日中之奠進茶膳以女官恭理喪儀王公大臣
內務府總管率之內監轉進於

皇帝親奠殷奠既徹饌女官奉冠服詣燎所福晉命婦
內府婦女皆從

欽命公主福晉或嫔戚大臣夫人一人於燎所祭酒行
禮將葬隨行有女侍及內府婦女餘皆如

列聖喪儀凡

皇后大喪

皇帝主喪儀初喪

皇帝冠去緯輟朝

皇子去冠服哭踊宮中自

妃嬪以下咸摘耳環去首飾屆時奉安

梓宮於

宮中正殿設几筵建丹旒於宮門外之右陳儀駕於

宮門之外

特簡王公大臣恭理喪儀既斂迺奠

皇帝成服

皇子福晉以下咸成服

皇帝縞素十三日而除兩月後

御門聽政

郊

壇大祀祭服行禮

親臨

几筵前素服視奠恭遇

皇太后

皇帝躬詣

几筵

皇太后乘輿由中門中道至檐下降輿

皇帝乘輿由中門中道至階上降輿

皇子喪服百日餘日素服詣

几筵前仍喪服

皇子福晉亦如之

皇孫恭理喪儀王公大臣及

殯宮守衛執事各官及嫺戚百日除服羣臣二十七日

除服皆百日薙髮十三日內各衙門文移用藍印

奏本用硃印內外官員二十七日不作樂不嫁娶

皆百日薙髮

外省以初喪日起算
以詔到日起算

軍民素服七

日不作樂不嫁娶成服後朝晡日中三設奠

皇子出苦次詣

几筵前西嚮舉哀行禮如儀訖日行殷奠禮

皇帝親臨上食畢讀祝官奉祭文至闕外正中跪

皇子衆皆跪哀暫止讀文畢執事進奠几

皇帝旁坐祭酒三爵每祭

皇子行一叩禮衆隨行禮如儀詎日而殯先期以奉

移告

几筵行啓奠禮與殷奠同至日奉移

梓宮於

殯宮

皇帝親臨祭酒三爵

靈駕至

殯殿行奉安禮設几筵陳

冊寶

皇子祭酒衆隨行禮如儀行初祭禮翼日繹祭如儀
行大祭禮翼日繹祭儀同周月奠獻儀與啓奠同
承

旨恭擬

欽定四庫全書

卷四十七

謚號

敕工部製

冊寶諏吉行

冊謚禮前期遣官祇告

太廟後殿

奉先殿至日陳設

皇帝素服詣太和門陞座

閱冊寶畢

皇帝還宮正副使恭奉

冊寶詣

殯宮宣

冊宣

寶畢陳於

几筵左右

皇子上香奠帛讀祝三獻爵如儀禮成正副使復

命翼日頒

詔天下百日奠獻儀同初祭既卜葬吉奉移前三日遣

官祇告

天

地

太廟

社稷奉移前期一日行祖奠禮儀與啓奠同至日

皇帝親詣

梓宮前祭酒三爵不往送祭酒時

皇子行禮衆隨行禮畢

靈駕發

冊寶亭及儀駕咸前列沿途分站豫設

蘆殿繚以黃幔城

皇子王公以下隨行

靈駕至宿次奉安

蘆殿迺行晡奠如儀翼日昧爽行朝奠如儀至

陵寢安奉

梓宮於

饗殿

皇子祭酒三爵衆隨行禮舉哀是日遣官祭告各

陵寢並祭

后土

皇陵山神翼日行饗奠禮儀如初奠先葬一日行遷奠

禮儀如饗奠至時恭奉

梓宮於

寶城前蘆殿

皇子三祭酒至日

皇子詣

梓宮前祭酒恭移龍輜自隧道入

地宮安奉寶牀設香

冊寶於左右几遂掩閉

元宮

皇子祭酒舉哀迺卒哭各退行題

主禮既陳設大學士二人朝服行一跪三叩禮興恭題
神主禮畢迺行虞祭禮如儀禮成恭奉

神主奉安黃輿導引啓行沿途仍朝夕奠俟還京時升
祔如距大葬之期尚遠迺於

殯宮東廡製

神主

欽命大學士二人至

几筵前行題

主禮期年小祥讀文致祭禮儀與初奠同再期大祥儀
與期年同二十七月行除服禮

皇子喪服奠獻與百日禮同祭畢除服三周行禮儀
同再期

皇貴妃以下喪儀

凡

皇貴妃喪禮初薨

皇帝輟朝五日素服十日若殯期逾十日及殯而止

命所出皇子公主持服如儀內閣擬謚號候

欽定訓日行

冊謚禮如儀凡

貴妃喪禮

皇帝輟朝五日

妃喪禮

皇帝輟朝三日

嬪喪禮

皇帝輟朝二日餘禮節並如儀凡

皇祖

皇考妃嬪薨各按封號以治喪追封者視所追封之號治

喪皆如儀

皇子以下喪儀

凡

皇子喪禮未分封之

皇子薨逝適長者

皇帝輟朝五日已生子者

皇子福晉及所生

皇孫並成服如儀如奉

旨追封擇吉行追封禮奉

冊寶宣讀如儀凡親王薨喪

聞

皇帝輟朝三日有

特恩親臨者王子率合屬官員跪迎於大門外設

御座於左有司設奠几

皇帝坐祭酒三爵舉哀畢

駕興王子率屬跪送如初迎儀王子以下府屬官本支
諸王以下應有服者皆成服

諭祭二次

賜謚如儀世子薨喪

聞

皇帝輟朝二日

賜謚

賜給初祭大祭羊酒如儀郡王薨喪

聞

皇帝輟朝二日貝勒薨

皇帝輟朝一日及貝子以下鎮國公輔國公皆

賜謚

賜給羊酒如儀民公以下兵民以上居喪二十七月內

不燕會不鼓樂不娶妻納妾門戶不換舊符

服制

凡服制有五曰斬衰三年曰齊衰杖期不杖期五月三月曰大功九月曰小功五月曰緦麻三月服之差等有八曰斬衰三年者子為父母子之妻同

子為繼母

父之
後妻

慈母

謂妻子無母父
命他妻養之者

養母

自幼過
房與人

者子之妻同庶子為適母為所生母庶子之妻同

為人後者為所後父母為人後者之妻同女在室為父母已嫁被出而返在家者同適孫為祖父母

及高曾祖父母承重適孫之妻同

為人後者妻為承重同

夫妾為家長同曰齊衰杖期者適子衆子為庶母

謂父妻有子者

適子衆子之妻同子為嫁母

謂親生母父歿而改嫁者

子為出母

謂親生母父在而被出者

夫為妻

父母在不杖

適孫祖在

為祖母承重曰齊衰不杖期者祖為適孫父母為

適長子及衆子父母為適長子之妻父母為女在

室者父母為子為人後者繼母為長子衆子子為

改嫁繼母

謂父歿繼母改嫁而已從之者

從子為伯叔父母及姑

在室者為己之親兄弟及姊妹在室者為親兄弟

之子及女在室者孫為祖父母孫女為祖父母雖

適人不降庶孫為生祖母

慈母養
母孫同

女出嫁為父母

為人後者為其本生父母

仕者解任士子
報考丁憂一年

女在室

及雖適人而無夫與子者為其兄弟姊妹及兄弟

之子兄弟之女在室者女適人為兄弟之為父後

者婦為夫親兄弟之子及女在室者妾為家長之

父母妾為家長之正妻妾為家長之長子衆子與

其所生子為同居繼父兩無大功以上親者曰齊

衰五月者為曾祖父母女孫雖適人不降曰齊衰

三月者為高祖父母女孫雖適人不降為繼父先

同居今不同居者

自來不同居者無服

為同居繼父兩有大

功以上親者曰大功九月者祖為衆孫及孫女在

室者祖母為適孫衆孫及孫女在室者生祖母為

庶孫

慈養祖母同

父母為衆子婦及女之已嫁者

慈母養母

為其子婦同

伯叔父母為從子婦及兄弟之女已嫁者

為人後者為其兄弟及姑姊妹在室者夫為人後
其婦為夫本生父母為己之同堂兄弟及姊妹在
室者為姑及姊妹之已嫁者為兄弟之子為人後
者女出嫁為本宗伯叔父母及兄弟與兄弟之子
為姑姊妹及兄弟之女在室者婦為夫之祖父母
為夫之伯叔父母曰小功五月者為伯叔祖父母
謂祖之
親兄弟為同堂伯叔父母
謂父之
堂兄弟為同堂姊妹之
出嫁者為再從兄弟及再從姊妹在室者為同堂

兄弟之子及女在室者為祖姑之在室者

謂祖之親姊妹

為堂姑之在室者

謂父之同堂姊妹

為兄弟之妻祖為適

孫之婦為兄弟之孫及兄弟之孫女在室者為外

祖父母為母之兄弟姊妹為姊妹之子及女之在

室者為人後者為其姑及姊妹之已嫁者婦為夫

兄弟之孫及孫女在室者婦為夫之姑及夫之姊

妹

在室出嫁同

婦為夫之兄弟及夫兄弟之妻婦為夫

同堂兄弟之子及女之在室者女出嫁為本宗姊

妹之出嫁者為本宗堂兄弟及堂姊妹之在室者
曰總麻三月者祖為衆孫婦曾祖父母為曾孫曾
孫女高祖父母為元孫元孫女祖母為嫡孫衆孫
婦為乳母為曾伯叔父母為族伯叔祖父母為族
伯叔父母為族兄弟及族姊妹在室者為曾祖姑
在室者為族祖姑及族姑在室者為兄弟之曾孫
及曾孫女在室者為兄弟之孫女出嫁者為同堂
兄弟之孫及孫女在室者為再從兄弟之子及女

在室者為祖姑

謂祖之親姊妹

及堂姑

謂父之堂姊妹

及已之再

從姊妹出嫁者為同堂兄弟之女出嫁者為父姊

妹之子為母兄弟之子為母姊妹之子為妻之父

母為壻為外孫及外孫女為兄弟孫之妻為同堂

兄弟子之妻為同堂兄弟之妻婦為夫高曾祖父

母為夫之伯叔祖父母及夫之祖姑在室者為夫

之堂伯叔父母為夫之堂姑在室者為夫之同堂

兄弟及同堂兄弟之妻為夫之同堂姊妹

在室出嫁同

為夫之再從兄弟之子及女在室者為夫同堂兄
弟之女出嫁者為夫同堂兄弟子之妻為夫同堂
兄弟之孫及孫女在室者為夫兄弟孫之妻為夫
兄弟之孫女出嫁者為夫兄弟之曾孫及曾孫女
之在室者女出嫁為本宗伯叔祖父母及祖姑在
室者為本宗同堂伯叔父母及堂姑在室者為本
宗堂姊妹之出嫁者為本宗堂兄弟之子及女在
室者

皇朝通志卷四十七